

ديوان

أنا.. الكذاب..!!

للشاعر:

وحيد أحمد إبراهيم



حقوق الطبع والنشر محفوظة
لدار الأدب للطبع والنشر والتوزيع

دار الأديب للطبع والنشر والتوزيع	اسم الدار
أنا الكذاب.. (الطبعة الأولى)	اسم الديوان
وحيد أحمد ابراهيم	اسم الشاعر
2020 /19813 بدار الكتب المصرية	رقم الإيداع
978-977-85163-6-8	الترقيم الدولي
دار الأديب .	الإخراج الفني
	
Gmail: daraladeeb@Gmail.com	
Tel: 002- 0101444916	

أنا الكذاب !!..

الشوق فى الغياب غلاب ..
أيامه وجع ساعاته عذاب
ملهوف على رؤيه الأحباب
يقول ياريت قلبه يسمعنى
وانا آكابر وأقول أيه يعنى..؟!
براحته حتى لو باعنى ..
والحقيقه بعده بيوجعنى
وأبعثله فى الساعه الف عتاب
وأطلع انا الكذاب..!

ولما يهجرنى تلاقينى عند
واقرر اعيش بدونه وحدى

وقلبي يعاتبني ويتنهد
والأقلى كل مشاعري ضدى
ولو جاني أقوله ابعده
واحساسى بيمدله يدى
ولو قاللي وحشتنى
عينيا ترد بالجواب
واطلع انا الكذاب..!

وأحاول أدلل وعليه أقسى
واحساسى منتظر منه لمسه
تخلى قلبي لعذابه ينسى
قبل ما يخطب يتفتح له الباب
واطلع انا الكذاب..!

ولو منى قرب اتمنع
ولو كلمنى احساسى يسمع
وقلبى يأمرنى لحناته أرجع
الحياه من غير الحب سرااااب
والآقى الحب دائما غلاب
وأستسلم واطلع كذاب !!..



قلب من ورق ...!!

رأيت قلب بين الورود
على سحر الورد يتفوق
وقلبي للورد ... ودود
لكل ما فيه ... يعشق
أرسلت من قلبي سلام
وهو بالسلام قد سبق
أستيقظ أحساس الغرام
وبداخل الوريد تدفق
دنوت من رفته مبتسما
وسحره بقلبي يخفق
فرقص قلبي مبهجا

وأدركت ان حلمي تحقق
فزرعت كل الارض ورد
وعطره فاح في الأفق
ان سعادته الحبيب فرض
والأهتمام به منطق
وعشت بين أشواك
حتى يدوم للورد العبق
ولم أقصر فيما عشق
ان أختلف الفكر او أتفق
وفجاه أتى ربح الفراق
ذهب معه وأفترق
وخالف كل عهد بيننا
وما كنا عليه نتفق
وترك في قلبي الأشواق

وصدق فينا من صدق
تعجبت من أمر الرياح
سمعت قلبي بالحكمه نطق
لا تعتب على الرياح
إذا كان حبيبك من ورق



أصعب شعور...!!

أصعب شعور تكون مجبور

على السكات

جواك مهزوز ويتمثل

دور الثبات

مع أنك ملحوظ بتستعير

الابتسامات

قلت صدق العيون

ما بيخفي الأهات

وكثر خير الشفايف

بتضحك والقلب مات

أصعب أحساس تعيش

جوه تابوت..

وسط ناس عايش
لكن بتموت..
عايش في بحرك مسالم
وجنبك حوت..
بدون ما يفكر متسيطر على
كل القوت..
زمن جديد وله تقاليد
مليان عيوب
وفكر بعيد وعكس
الآتجاه مرغوب
وصوت الحق ضايع
والباطل مطلوب
ولو قلت مغلوب يهزمك
صوت النبوت..

شاييل وماشي وظهرك
ما أنحنى
والدور اللي ماشي كله
بيقول أنا
ترضى ما ترضاش هتتفد
أمرنا
الباطل له النفوذ والمال
له سلطات
الحب أتهد .. والكراهه
قصره أتبنى
وبكى الود .. والجفا
صوته غني
حتى الورد .. صار عطره
في الفنا...!!

تجاهله عمله
في الجمال أحباط
السعادة تشوفها في
أحلام الليل
والآحلام محبوسه في
خانه المستحيل
ومدام لسه صاحي
قابيل وهابيل
هتعيش يامسكين طول
عمرك في عاهات..



الشمس والظل !!..

يامن أهواه وغدا آراه
هل يستجمع القلب قواه
كيف يستطيع القلب لقاء
حلما أوشك ان ينساه
ياقمرأ أضاء فى سمائي
يا كنزا يحتوي كل ثرائي
يحمل حبا وحنانا
والقلب بالحب ما أغناه
يا حلما طال انتظاره
وغدا يحين الموعد
سأعرف كل أسرارہ
ويكون له بالفؤاد مرقد

اهدءا ياقلب لرؤياه متلهف
عجبا كم كنت تخشى اللقاء
مابين الشمس والظل
لابد يتوه الضياء..
غدا تراه ويطيب كل الم
إن لقاء العاشقين شفاء
تلقاه فى روضه وجنة
تملأها ملائكة السماء
وكيف يشقى فؤاد
وفى العلياء نقاء
غدا ستولد من جديد
وتنسى ماضى عنيد
فيه الجرح والداء
ويحلو حلما أنتظرناه صبراً

ويكون حبنا علنا وجهراً

ويصغى القلب طوعاً وأمرأً

لصوت الحاء والباء

ونذوب فى أشواق اللقاء

يانبضا له بالقلب أصداء

ياورد له فى العبير أرجاء

غدا تجمعنا نظرة

وتتحقق ... أمنيته

وتزول وحدته

هذا ماكنت أتمناه...!!



عمر تاني !!..

أيام الحزن يسيطر
على قلبي ... وقلبي يتعكر
وساعات م الحزن ... اتحرر
واشوف عمري بيتغير
مع كل حال..
أحس انى طفل صغير
لما الحب يكون اخضر
واحس انه حزن حبيبتى
من كثر دفاه يحرر
ويروق البال
وساعات اليأس يملكنا
من كثر الإحباط يهلكنا

واصغر كلمه.... تربكنا

وأحس اني تمثال

ساعات أحس بعبير الورد

الاقى قلبي جوايا يتمد

وساعات الورد في اليد

لا له عطر ... ولا منظر

وكأنه خيال

ويصعب على قلبي الوفي

لو حبيبي عليا.... جفى

والاقى شبابي.... مختفي

واحس ان عمري.... اتهدر

ورجوعه محال

والاقى دنيتي مغيرانى

وعمري يتغير في ثواني

كل واحد له عمر ثاني

حسب حالته يتفسر

وحسب الأحوال

غريبه النفس

تميل الى معذبها..

وتسعى لمن فارق هواها

وتتمنى من بالصدق كذبها

وتركها وعشق سواها

ربما بتمسكها تحسبها

شمس لن تترك سماها

لا تنظر لمن بالحب يجذبها

ربما هواه احياها

ياليت العقل يهذبها

لتعلم من تهواه أشقاها

ورب من هوته الزمها
بفناء ما كان ابقاها
يا نفس من الهوان تحرري
ان فقد الكرامه عاهه
ان للكرامه عزه ان رحلت
رحلت عن دنياكي ضياها
ولا تتبعي اماره سوء .وابحثي
عن من لعزتك يكون تقواها..



جمال نادر...!!

قالوا .. عن الخمر حرام
وعندما أراكى أسكر
واصبح النظر اليك آدمان
ولذتى حين العين .. تبصر
قررت عن ذنبى أتوب
نويت عن دربك اهجر
وجدت لك بالعين مقام
وفى المنام طيفك يحضر
ف عشقت المنام والأحلام
وما عدت ليلى أسهر
وهل رؤياكى فى المنام حرام
سألت عن الأمر ..مفسر

قال النظر للجمال حلال
فأطلقت عيناى تبصر
وأصبحت أخشى غيابك
وجمال لذتى تتأثر
فقلت أبحث عن شبيهك
فوجدت جمالك لا يتكرر...!!



زمن محترف..!؟

نعيش في زمن محترف

يصنع الغاز.... متعبه

في وسط بشر مختلف

قلوبه للحب سالبه

ونحن عن غيرنا نختلف

نأترف مع الارواح الطيبه

تجمعنا بالطيبين الصدف

والصدف اصبحت غائبه

كيف نحس بالرضا..؟؟

وحولنا نفوس مبغضه

كيف نزرع ... ورده

في أرض بور رافضه

هل نجد طعم الموده..؟
في قلوب ... حاقده
كأننا في جمر موقده
وشده لهيبها غالبه
تملكت الانانيه كل ذات
تحرسها الجنود بكل باب
وفاعل الذنب يتباهى
ويلام الساعي للثواب
للرويبضه في الأمور حديث
إذا سئل ... ضل الجواب
والعاريات بلا حياء تسير
امام العيون تعريها الثياب
واعتذر العبير والندى
الى قلوب غير نابضه

وتطاولت الأقدام على الشجر

وأصبح كل الثمار معاب

وإذا رأيت للأقدام ظلاً

أعلم الشمس ذاهبه للغياب!!..



ذكريات ..!؟

لقيت في كتابي ورده

رجعتني للذكرى

مكتوب على ورقها كلام

انا نسيتته وهي فاكراه

صحت حب كان جبار

عشناه بدون اختيار

القلب في هواه احتار

ما بين الجنه وبين النار

لو غبنا تندهنا اسرارنا

ويا الشوق تسهرنا

تتوه افكارنا.. يطلع نهارنا

يلاقينا سهرانين..

عينينا بتناجى القمر
وقلوبنا غاويه سهر
كان النهار يبعثر
لما يلاقينا مروحين
دوبنا في الحب ودوبنا
نسكت تتكلم قلوبنا
في الصمت نسمع دقتها
نغم بيهز وتر قلوبنا
ونحس بجمال محبتها
كنا عايشين الحب وبس
عايشين احساسنا بالهمس
القلب بالقلب يحس
مشاعرنا يرويها عبير
شايلها النسيم على جناحه

يصبح علينا في صباحه
رغم المسافه رغم البعد
قلوبنا تصحى مع بعض
نقابل بعضنا بالورد
طعم الحب حنان وود
ويصحى الاحساس ولا يهدا
من كام سنه زي النهارده
هاجرت ندهتها الوحده
هي فارقت... وباقيه الورد..



صديقي ..

صديقي يا نور في طريقي..

بحبك حب حقيقي

صديقي يا حته مني

عاش نبضها جوايا

يا عشره عمري في زماني

احساسي انك اخويا

الزعل ما بيننا غايب

عاشين زمانا حبايب

لو زعلت لحظه مني

يجبرني اسامحك شوقي

بتحملني و اتحملك

انا وانت زي الفلك

شمس وقمر في السماء
بستمد منك بريقي
لو ذكروا سيرة الادب
انت للادب رمزه
لو قدروك بالذهب
انت للذهب كنزه
لو راحوا لباب الكرم
انت بسخاءك عزه
انت الصاحب المحترم
يا توأم روعي واحساسي
الوفاء جواك موجود
من دمك ما يخلصش
في الصفاء ما لكش حدود
بحرك ما يتعرشي
بالسماح طبعك موعود

تحب ما تكرهشى
الاقى زيك فين ولا مين..؟؟
فى الشبه حتى ما لقيتشى
تملى مندى ورق وردى
سندى لو اتهزت أرضى
مشاركنى فى كل احوالى
دائما قلبك موجود عندي
مطمئني يا صاحبي لبكره
لو كان حتى مستفز
يا صاحبي ونعم الصاحب
معرفتك من حسن الحظ !!..



المزاد !!..

قلبي بيكسب في المزاد

خذ شهره في كل البلاد

بحنيته ورقته..

المزاد عليه يرسى

اصل غاوي حضرته

يكون دائما رومانسي

شاف اوجاع وعاش احزان

لكن ده في فكرته منسى

ودائما غاوي يبتسم

عز المحن عز الالم..

يسرح مع ثومه يسمع حلم

وعليه الشحوره بتمسي

ونبض قلبي ايقاع رقصي
انا غاوي الفرحة ناس الجراح
ولا عمري ندمت ع اللي راح
لا فكرت يوم في الماضي
ولا وقفت مره قدام قاضي
ولو دنيتي زعلت اسايستها
واعالج احزاني و اعكسها
لو قابلتني ورده اعاكسها
واضحك كمان بصوت عالي
والضحكه تسهر في الليالي
تبسم كمان شمسي
احب تملي اكون رايق
ليه اتخفق ليه اتضايق..؟
ليه ارضي بظلم نفسي..؟؟

عشان كده السن بيكبر
قلبي تلاقيه دايمًا اخضر
حتى لما الشعر شاب
قلبي عايش بروح شباب
لما قلت لأنثى بحبك
سألتني قولي هو سنك كام
رديت بالاجابه قوام
انا ما ليش تاريخ ميلاد
ورسي على قلب المزاد!!!



بدون كلام..!؟

اسمعيني بدون كلام
اسمعيني باحساسك
حسى بنبض الغرام
هيقول لك كل الكلام
لما ايدك تلمس ايدي
تحرك النبض في وريدي
وقلوبنا بلغتها تتكلم
وتصحي حروفها الاحلام
واحساسي يسافر يبوسك
ينور قمرك في ليلك
تشرق في نهارك شموستك
تعطر خدودك ورودك

تضوي اللمعه فى عيونك

تتزين بالفرحه طقوسك

ويزيد ما بيننا التماسك

مهما نقول من كلام

مش هيوصف اللي حاصل

لكن احساسى الغرام

بين قلوبنا له تواصل

اصلي للكلام لغه

لكن للاحساس لغات

ما تسمعش يا حبيبتي

الا فى صمت وسكات

الاحساس يقرأ اسرار

لها فى القلب سكنات

واحنا حبنا أرواح

واخذ احساسها البراح
يعرفك بدون مايلمسك
عايش حواليكى يحرسك
غذاء الاحساس روح
تحىي فى الحب المناسك
واللى يعجز عن وصفه الكلام
هيقدر يسمعه احساسك



سنين هواكى...!!

سنين هواكى متتعدش
هي السعاده بتتسبب
قلبي طول عمره ما حسش
وياكى بلحظه تعب
ازاى يفكر في أيامه
وهو بقلبك أتوهب
نسائي الدنيا الجارحه
محا .. مني كل الغضب
وفرحة بتولد فرحه
في عيون القلب سارحه
في اول لحظه أصحى
يقابلني قدري اللي أنكتب

آلاقي قوتي... حبات عنب
تلمسني بإحساس من ذهب
واتمسي بهمسه تقول لي أنسى
تقابلك لحظه.. فيها لمسه تعب
وإحساسك دافي.. يهزني متعافي
يقول لي لسه.. ما خلصش العنب

وبسمه على خدود... ويا قلب ودود
وقمر ممدود... نوره في عيني
وقلبي موعود .. بحنان بيعود
ما لوش حدود.. يسقيني يرويني
وقلبك يجود.. ببسمه عود
شايل ورود .. عبيرها يناديني
ترسم ضحكه .. وعبير في السكه

ما فكرتش في بكره.. حتى يجيني

ما ليش أماني ما أنتي واخداني

في جنه ورديه فيها تحيني

واللي وياه حوريه فوق جدول ميه

ميته حنيه .. وعيشته هنيه

وقلب ما يكذب..!

ممکن يحسب..؟

قلبي مالكة كل ما فيه

احساسك بلمسه يصحيه

وجودك فيه بيدفيه

ومن نبع حنانك يشرب

ليه .. أحسب..؟؟

ليل بيسلم نهار... ونهار بيسلم ليل

ليل السعاده فنار ... منار لكل سبيل

للسعاده في النهار اسرار

تمحى الالم والويل

ويوم ورا يوم بيعدي

آلاقي عمري مني بيهرب

ازاي احسب..؟؟

وعمري كله وياك يوم

سعاده في ساعاته بتدوم

اجهل زمنى ما يبقاش معلوم

والنسيان ع العمر بيغلب

ازاى احسب..؟؟

سنين هواكى...!!

همس الحب..

عدي يا همس الحب..
ع الورد في البساتين
خلي الورود تعود
تشوفها عيون عاشقين
صحي في القلوب نبضها
خليهم مخلصين
علمهم لغة الحياه
تجمعها الحياه
في حرفين..
واللى دايبين في اللغة
للحروف حافظين
الحروف دائما متشبكه

في حضن الايدين
بتخلي الاحساس اما يسافر
يلاقي وطن حنين
خليك يا همس صابر
وعرفهم الحقيقه فين
اللي مايصون النعمه كافر
والحب ده نعمتين
نعمه حنان دافيه
فارشه الامان حواليك
ونعمه تلون ملامحك
ب أحلى ما فيك
واللي خدع ومكر وهجر
واللي بالنعمه كفر
لاتلومه.... ولا تعاتبوا

ولا تعدي عليه
ما حدش يعاتب صنم
ملتزم باحساسه
ده حتى الورد لو باسوه
هتتنكر لعبيره .. انفاسه
واللي مدمن لسع الشوك
مش هتلاقى ايديه ناعمين



عنادي...!!

احساس بيبداً من جديد

جواه عنادي

يتحدى باصرار عنيد

جرح الماضي

ما فehوش الم مفهوش تنهيد

بيقول قلبي على الحب نادي

احساس رافض ينكسر

واللي هجرني اكيد خسر

الحب اكيد في قوته سر

ينتصر في كل وادي

احساس بيحارب حب المراهقه

احساس بيحارب حب الصفقه

احساس مش طالب شفقه
احساس بيقول الحب زادی
احساس لمعنى الحب عارف
احساس باسم الحب حالف
لو للحب الحقيقي صادف
هيكون روميو تاريخ ميلادي
الحب في قلبي له سطوته
حب حقيقي له قوته
له في صدق القلب طله
حب ما يعرفش يتسلى
حب عن الحب راضي
وحناني ما يعرفش يقصر
لو جف نبعه سماه هتمطر
ولا هيهزنى ولا هتأثر..
بقلب كان م الحب فاضي...!!

الاقترب ممنوع ..!؟

الكتف خلاص صار موجوع

ما عادش قادر .. يشيل

حاسينه من البدن .. مخلوع

ياما شال .. وياما فوت ..

مش قادر من كثر الوجع

يتحمل حتى خيط حرير

وناس حواليك غاويه هلاك

حاسين لهم حق الامتلاك

عيونهم كاميرات رصدك

شاغلين بالهم بحالك

ايه راح .. ايه جالك ..؟؟

يتكلموا عن احوالك

يغيروا الحقيقه في دارك
وتعيش متهم بما ليس فيك
يرسموك حسب خيالهم
يلونوك حسب عيونهم
يوصفوك بما ليس فيك
زرعوا الشوك فى الطريق
وزعوا الشكوك حواليك
لا هم مقسمين الارزاق
ولا الكون ماشي بتقديرهم
شاغلهم حالك عن حالهم
ناسيين الفساد في دارهم
ناسيين انك ساتر اسرارهم
والكل بالذنوب متهم
وكل العيون فيها دموع

ما يخلص من العيوب إلا صنم

وهم عيوبهم تملأ نجوع

وانت بالنسبة لهم موضوع

ناس عايشين زي التعالب

الخبث في طبعهم غالب

عايزين يهدوا عليك دارك

لجل ياخذوا منه قالب

لهم في اهدافهم مطالب

فوق كتافك يكون راكب

مش واخذ باله الكتف متوت

من كثر الشيل ياما فوت

لمسته خلاص بتموت

مكتوب الاقتراب ممنوع..!؟

الرحيل البعيد...!!

ربما نسافر ونعود
من مكان كان بعيد
وسطوه الشوق الممدود
تعود بنا لقلب فريد
وتبتسم لنا الورود
بعد خريف كان عنيد
ربما يحن الشوق يوما
الى زمن الطفل الوليد
نستنشق زكري زمن سعيد
أو نجدد أمل مفقود
ربما اتوه عن نفسي
وأعود اولد من جديد..

ذلك هو الترحال القريب
كله فرض له منه نصيب
لكن سيااتي يوما اكيد
يقف النبض في الوريد
نرحل عن كل الوجود
نترك ما نريد وما لا نريد
ذلك هو الرحيل البعيد
هل اعدنا لهذا الرحيل
بما يجود علينا في الخلود!!!



كلمة .. و.. وعد...!!

لما تشوف أمل فى انسان

مرسوم على كلمه ووعد

وقلبك بالامان مليون

مطمئن هتساعدك يد

وتلاقي الامل جبان

وهرب وقت الجد

وتلاقي نفسك مخدوع

موجوع عرقان في البرد

صوتك ممنوع من الرد

والدنيا فاضيه حواليك

مش شايف قدامك حد

الى ساند ضهرك خرع

وحيطانه مايله هتتهد
كذاب خسيس مش جدع
قلبه للعداوه ألد
وترجع تعيد حساباتك
في اللي خان الوعد
تلاقي جواك ثباتك
قادر ...ع الدنيا يرد
يقول لك في الصدمه حكمه
اخرج من جوه الظلمه
وارجع تاني شوف الورد
وهاقول لك كلمتين بجد
النار تزيل الصدا من
الذهب في الحريق
والنار تظهر في المعدن

جماله تحيي البريق
ورب ضاره نافعه
تلاقي الترياق في العض
حاول للرضا توصل تفوز
هتلاقي جواك كنوز
خلي يومك تفاح وموز
والقشر في قفص القرد..



لغة الحياه..

الحب لغة الحياه
وعشاق الحياه طلبوه
ربيعه يداوى الآه
على ليل السعاده نادوه
لجل القلب يبلغ مناه
فى صوت يهزك لو قال ألو
ولما حبيبك تكون وياه
تحس الكون كله فضوه
هو بس اللى عنيك شايفاه
تنسى الزمن وانت معاه
تحس الكره كمان دفنوه
وفى الشوق قلبك يتوه

على شط حنانه لابس مايوه
عايم مابين أمواج حنانه
وانت كمان عاشق غرقانه
تحس المالح كمان حلوه
والورد كله فى بوكيه لموه
جمعوه من أنحاء الأرض
مكانك بين الورد بنوه
حقيقي تلاقى الحب حياااه
ميعرفهاش غير اللى عاشوه!!



بدون عتاب...!!

كنت ورده وانا جنائني

كنا بنكمل بعضنا

كنت شايلك وانت شايلني

مشتكاش يوم كتفنا

رضا القلوب كان جابرنى

تكون انت منى انا

ما فكرتش يوم تبغني

وتنسى ايام الهنا

قلت ملل.. حبه زعل

مسير الحنيه تضمننا

وطال الغياب وأمل كذاب

بيقول لي هترجع لعشنا

لما توهنتنا الليالي
اختفيت عن شطنا
خليت احساسى وجعنى
لما اتكرت لحبنا
وعمر بطوله تخذعنى
وأيامى لعشرتك مطمئنه
طلعت من فصيله القطط
فصيلتك غريبه عن دمننا
يا ترى احنا اللي غلط
ولا .. ده...!!
من سوء حظنا
خساره فيك العتاب
خلاص ما عدتش تهمننا !!..

رد محرج !!..

السنين عايشه في صمت

علي احوالي بتتفرج

لا حققت بما به حلمت

والظاهر ان الامل اعرج

نويت الصيام وصمت

وصبرت على العيد يحضر

لما على ميعاده سألت

قال لي استنى لحد ما تفرج

وقلت اكيد الامل جاي

زمانه في السكه بيدحرج

والعمر عدي في الوجع

لا لقيت يوم الدواء

ولا الألم عنى رجع
ما لقيتش للامانى مخرج
لما سالت عن حظي في الودع
للأسف..
الرد كان مخرج !!..



الملكة..!!

شفت الربيع فارد ع الورد عطره

والورد يتباهى بجماله في السكه

والعبير في الورد له سره

مستخبي في رقه الورقه

والعيون تعشقه الجمال

من نظره..!

والعطر في الصدور

يخلي العقول رايقه

اتمنيت اقطفلك من

كل بستان ورده

واكتب لك من عطر

القلب كلمه..

واقول لك هديه

حبي يا عاشقه

لكن لما قابلتك الورد خبيته

لانى تهت ورحت في ربه

لقيت عبيرك في

العطر أرقى..

والروح هامت مع الاحساس

والدم في الوريد

سرع الحركه

اصل عطرك فريد يزيد

على العطور تكه

لما ضميتك اتعطرت

بريحتك الصادقه

فيها معاني العطر

اللي بتزوقه الرقه
عرفت ان الورد عامل
لعطرك مشاركه
وعرفت كل الورود عبيد
وانت للورود ملكه...!!



ماضي ومستقبل..

بين ماضى عدت عليه سنين
ومستقبل مش باين له علامه
النفس تايهه بين الاتنين
والروح حيرانه فى دوامه
ندم وقلق وقلب حزين
بندفع عمرنا غرامه
مش عارفين رايحين لفين
عاشين حياتنا روتين
عثمانين فى سكة سلامه
والفرح يلون الايام
بالحظ صاحب الفخامه
ومازلنا ساكتين صابرين

والصمت بقوته مالكننا
نسرح فى ماضى هلكنا
كان املنا ينصفنا
مستغربين على حنين
قدامه ياما ضعفنا
شلناه جوه نن العين
وكان يادووب ضيفنا
ودمو عنا جوانا تستخبي
على قلب فقد المحبه
وابتسامه رسمتها كديه
تدارى الأنا المتعبه
واوجاع تخفيها الكرامه
وأملنا تتغير الأحوال
ومازال جوانا سؤال..؟؟

امتى الأمانى تشدنا..؟؟

من الدوامه لشطنا

ونلاقى السعاده تضمنا

سايبين لأحلامنا الزعامه..!!



ممنوع الحب ..!!

ليه الشيطان ماشى قدامنا..؟

ماسك فى أيديه الصاجات

ليه صوته غناه غوانا

وسبقناه فى الخطوات

وغيرنا اصول الزمن

وكل حلو فينا... مات

والحنيه اتبدلت قسوه

والوعود ضاعت فى نسوه

والجحود ارقى الصفات

والذنوب لها الف غنوه

والاحزان رمز الحسنات

حتى الكلمه الحلوه..

مسك حروفها السكات
والحياء وجبر الخواطر
كانت فى زمن فات
والعشره ع القلب هانت
اتنسى العمر فى لحظات
والانانيه صارت مخاطر
بتشوه الغير بالعاهات
كرهنا الالوان الوردية
رفعنا للداكنه رايات
والسماح اتشوه فى الملامح
وحياتنا أصبحت خناقات
ليه .. وليه الف سؤال..؟؟
محتاجين جوانا اجابات
والاجابه فى كلمتين
الحب أصبح ممنوعات..!!

خايف !!..

خايف للحب يخبط
وللحب القلب يصدق
وبعد ما يربطني وارتبط
يسيبني في البحر اغرق
اصل اللي غاوي يتسلى
لا عنده اصل ولا مبدا
ولا الغدر معاه يفرق
يجرحني ويصيبني بغدره
واتوصف انا بالعبط
بتمنى حب يكون حنين
من حنان قلبي يشرب
يكون زي ورد الجنائن

أراعيه عطره منى يقرب
مايكونش زي خيال او ظل
لما يغيب النور... يهرب
حب يكون للقلب قل
قلبي لعبيره يرغب
والاخلاص معايا يكسب
عايز حب للقلب رايق
ما يكونش غاوي يشخبط!!!



مركب ورق...!!

أحلام وتاهت في السبق
واللى تتحقق منها اتسرق
والليل طالت ظلّمته
والفجر أتأخر في طلّعه
والشوق زادت قسوته
صار القلب كأنه حطب
مش عارف الزمن زعلان
ولا على امائنا غضب
ولا السعاده لجل تبان
لازم نكتب لها طلب
طيب م احنا ياما نادينا
ووعدها علينا كذب

نشوف أحلامنا ع الموج تركب
نجرى وراها نلاقيها بتهرب
ونلاقى وعودها علينا بتكذب ..
ونشوف لحظة شروقها بتغرب
ويصيبها بسرعه نوبة غرق
وكأنها مركب ورق...!!



الفجر الوليد...!!

أحضن الفجر الوليد
قابل النهار بصفاه
خلي دقائق قلبك عبيد
والقلب سيد في الحياه
خليك وفي في الوعود
للحبيب طوق النجاه
كن لقلبه دايمًا ودود
ما تنساش الحب حياه
حن على الورد بلمسه ايد
عطره في الطريق تلقاه
صحي الاخلاص خليه موجود
انده ضميرك لو عنك تاه

بحسن الاخلاق خليك حميد

اتبع صفات رسول الله

خليك ويا القمر عنيد

لو يوم غاب عن سماه

خليك انت قمر بيقيد

يعم ع الناس بنور ضياه

هتلاقي الدم في الوريد

متحصن من طعم الاله

خليك للناس انسان مفيد

بعد الرحيل تعيش ذكراه...!!



بتسألني..؟؟؟

بتسألني عن شكلي وملامحي..؟

هو آدم كان شكله أيه..؟؟

لونه أسمر ولا قمحي

ياترى حوا . اعترضت عليه

السعادة اتسامح وتسامحي

وتلاقي في يدك جنيه

وتقدرى تداوى جرحي

وقلبي بحبك تملكيه

الطين اسود اللون

وكلنا منه وإليه

الجمال فى القلب الحنون

الحنان عندك يساوى أيه..؟

الجمال فى طيبة القلوب
اللى تعرف للورد تراعيه
ده جمال الاشكال عيوب
الرجوله لاتهتم بيه



سر الحياه...!؟

ان صغرنا او كبرنا محتاجينك
يا منوره في حياتنا طول سنينك
انت اللمسه الناعمه في ديتنا
مين يستغنى عن حريك..؟؟
ما اقدرش لحظه استغنى عنك
في شفره بيني وبينك
بلاقي روعي في نشوه حلوه
لما يلمسها عبيرك
والاقي نفسي مستقره
لما يأنسها وجودك
حتى احساسى بعرفه
لما يظهر جوه عينك

لو فرحت عينيك تضحك
لو حزنت تنزل دموعك
امي يا بوصله اتجاهي
لو تهت يرجعني دليلك
انت الوحيد المخلصه
اللي صاحي جواكى ضميرك
انت لاولادي وليا زادي
كلنا عايشين في خيرك
لما ايدك تلمس خدودي
ساعتها احس اني صغيرك
واتمنى اعيش في حضنك
واكون في حنانك اسيرك
كلمه أمي لها سر ثاني
ما تتقلش لحد غيرك!!!

الغربه...!!

نداهه ندهتتى من مكان بعيد
بصوتها اكدت لى رزقى عندها هيزيد
فردت الجناح وطرت بقلب سعيد
اول ماقابلتنى مسكتنى بيد حديد
لقيت الغربه ايامها صعبه مجنونه
يادوب نومه وقومه بقيت جوه طاحونه
لاقريب لاصاحب يمد يده بمعونه
لانوم لاراحه اصل الشغلانه مسكونه
لاحريه لا سياحه خطوتك فيها مكنونه
لاعفو لاسماحه غلظة العمل مضمونه
والسعاده تطلقها كبرى وبينونه
للغير توهبها وانت زى الليمونه
شراب بارد للغير وتتعصر بسخونه

اول ماترجع يتفرد الدراع سلامات
وكله حواليك زى السباع يقولك هات
مفكروش فى الصحه اللى شوهتها الآهات
مفكروش فى الصحبه اللى اتنست فى سكات
ولا كام مريض عاد مليون عاهات
ولا كام شهيد فى الصندوق لبلده عاد
ولا الشباب اللى راح لجل شوية دولارات
وفى يوم وانا قاعد..
مع اولادى قعده حنونه
سألونى سؤال اجابته جوايا مدفونه
لو غاب الاب ممكن تتوجد السكينه
لما يغيب عننا .قولنا مين يربينا..
صحيت جوايا الآجابه
آبوها غربه ملعونه!!!

عيونك...!!

أول م عنىكى تشاورلى
احس قدامها بضعفى
أهلى وعلى النبى اصلى
واجرى وراكى متخفى
عيونك ضى تنورلى
ونورها يزيد من عواطفى
متعرفيش ايه يحصللى
انسى أهلى ومعارفى
لما عنىكى تشاورلى
امشى وياكى تحت المطر
واحس ان السما صافيه
كيف احس ببرد الشتاء؟

وأنا حاضن ايدك الدافيه
لامطر. لابرد. ع البال خطر
ولافكرت فى جغرافيا
شتا او صيف حضر
ايامك بالربيع وافيه
تحضنى..

وآه لما اشوف بسمتك
ريشه وبت رسم سعادته
بتظهر جمالك ورقتك
واحس حبي لكى عباده
واشوف فى عنيكى ضحكك
تبتسم مع شفائيك بهواده
اشوف الكون كله بيضحك
ماجبتش زيك ولاده

تقابلنى

سحرتينى.. غيرتينى

حسيت..

انى معاكى ملاك

لو غبتى يوم عن عينى

بينى وبين الفرح فراق

تكونى معايا وتسبينى

تصحى جوايا الاشواق

انا طفلك احضنينى

وخللى هواكى يغازلنى

ومين غيرك يشاورلى...!!



سر في ذاتي...!!

كم من زائر... أمام العين يتردد
ولست كل زائر.. به الفؤاد يسعد
رب زائر يأتي... وعن البيت يرحل
ولا يزال أثر العبير... بإركان الفؤاد يرقد

ما تمنيتك تكون ضيفا... تأتي برهه وتبعد
وانت للجسد روحا... في أحشائه تتمدد
لن تفارقني وإن رحلت... أراها في لحدى توجد
وفي جنتي آتمناك وليفا... فهناك الحب مخلد

ما عشقت مثلك أحد... انت الحبيب الآوحد
آآه لو سمعت فؤادى... صوته فى وجودك لا يهدأ

له فى الوادى صدى....كرعد له مع البرق موعد
لوددت نطل طول المدى ...انا وانت كأوراق الورد

سأظل لقلبك عاشقاأحمل بقلبي لك الود
ويظل السر عالقا ...مثل الغيب فى الغد
يكفى أحبك فى ذاتى....وما أغلى الحب فى صمت
أخشي إن علمت بحبي ...ينقطع ودك عن قصد
فليس كل حبيب يجيب ...على من يحمل له الود
كفى ان تراك عيني... فيصير للقلب دقات و نبض



عيد الحب...!!

صحوا الحب فى القلوب

خلوا الوعود أفعال

الحب مش كلام مكتوب

وأحلام ع اللسان تتقال

الحب الصحيح مشطوب

من الخداع والانفصال

عاشق لقلب حبيبه

لو حتى قام زلزال

خلوا الحب نبضه يدوم

سماه صافيه بدون غيوم

أحلامه دافيه تهدى النوم

آيامه متزوقه بالجمال

احساس يسافر فى المشاعر

حنانه وافر فى الخواطر
بالجرح كافر للدمع هاجر
أيامه عاشقه للوصال
حب دافى يكون حنون
سعادته تلمع فى العيون
صوته مسموع فى السكون
جوابه مش منتظر السؤال
حب يحافظ ع الشعور
حب فى الضلمه نور
نسمه هواه مليانه عبير
خطوته فى الدروب دلال
حب يكون للقلب روح
برفان اخلاصه تمللى يفوح
باب محرابه دايم مفتوح
يكون .. للآذان .. بلال!!!

غلطه !!..

كنتى فين يا لاءه..؟؟

لما قلت آه..!!

آه خدتنا فى سكه

خلتنا صاحبنا الآه

والآه داخله مسابقه

فازت بوجودها فى الحياه

والحياه صارت عاشقه

تسمع صوت الآه

كنت متساهل فى التعامل

اكون متسامح او مجامل

لقيت خدتنى المسائل

انى اتوه فى الحياه

كنت فاكراً لما أضحي
التضحيه هتكون في صالحى
لكن زرعت بأيدي جرحى
والهموم كانت مقابل
ملعون في الحق ياكسوف
الطيباه خلتنى أشوف
عكس اللى كنت بتمناه
غلطتى مقولتش لاءه
وتساهلت وقولت آه
غلطه زقتنا زقه
خلتنى عكس الاتجاه!!!



وبقى حلم...!!

شئ جوايا ناقصنى
فى حياتى شئ مهم
يكمل سعادتى ويبوسنى
يحرك فى العروق الدم
شئ فى دنيتى يكملنى
غيابه عنى بيألمنى
بس تايهه ملامحه منى
وتايه فى أحلام التمنى
نفسى يوم الآقيه
جايز يكون حرف فى كلمه
أو ضمة الآهل واللمه
شعاع نور يمحق الظلمه

أو يمكن حب مستتيه
جائز قلب بالحنان مليون
يصحى الحنان اللى جوايا نعسان
او المعنى انى انا انسان
سره فى الحياه يحييه
شئ مخلي عقلى شارد
فى الآمانى شراعه فارد
آحتمال قربيه وارد
يسمع الروح اللى بتناديه
كل واحد مننا
يبحث تمللى عن الآنا
والانا لجل الهنا
كلنا نسعى اليه
ولما نحصد كل آماننا

وتتحقق كل آلامنا
ويتم زماني الكرم
حتى لو عمرى أبتسم
الآقى لسه ناقصنى حلم...!!



الشوق الحائر..!!

آت بعينك وأسألها
عن صورتك التي امامي
كم في اليوم أقبلها
ومدى شوقي وهيامي
عيناي ماكنت أغفلها
لم أرى حلما في منامي
وطيور السماء أحملها
من قلبي أغلى سلامي
ولحظات غرامي أوصلها
بلقائك داخل محرابي
حتى أيامي أزهلها
كثرة عباداتي لغرامي

واشتقت الى طعم حنانك
بعدما وصلت الى فطامى
وشوقى اليكى يقتلنى
وبعدك أضنى قوامى
هل أطمع يوما ألقاى
وتتولى السعاده زمامى
أم ستظلين عنى غائبه
ويطول فيكى صيامى
للعيد موعد يأتى
ياليتك عيد فى أيامى...!!



توبه وهميه...!!

واقف مستنى نزول المطر
لجل يطهره من الذنوب
آخيرا خلاص أفكر
يبعد عن الذنوب ويتوب
بدنه بالحرام متلطح
خلى كام واحد يصرخ
بكرباج شيطانه مضروب
كام واحد كان بينفخ
من قهره اللى فيه مكروب
نسى افعاله اللى تكسر
الزجاج من حذف الطوب
كان ناسي انه للموت مطلوب..

وسؤال على باله خطر
ليه منزلش المطر..؟؟
ياترى ده من كتر الذنوب
ولا مش عايزه يتوب
بيسأل نفسه وهو واقف
وسط أرض مليانه عيوب
من جهله نسي ان التوبه
تحضر بطهارة القلوب..!!



صدقتيهم..؟!!

اخسريني ٠٠٠ واكسبهم

قدروا يخلوكم تشكى فيا

كذبتيني وصدقتيهم

للاسف ما خدتي بالك

إن الغيظ منك ماليهم

عايزين يشوفوا دموعك

على خدودك قدام عينيهم

زرعوا كل الشك فيكي

وفرقونا وخلتيمهم

يصدقوا أن طريقي

بقي خلاص فاضى ليهم

مفكرين لما انجرح..

ممکن یوم اندہ علیہم

عایزین یاخذوا مکانک

لکن قلبی مش غاویہم

فکری لیہ قصدوکی

م الدنیا ملیانہ حوالیہم

عایزین قلوبہم تستریح

من شوقنا الی کاویہم

وقلبي ناحيتهم يسرح

واعیش ویاہم سہر لیالیہم

وصدقتیہم !!....

مہما الزمن یفوت مش حقول الحب مات

وان عطش قلبی ف غیابک ہترویہ الزکریات

ہمہ قدروا یبعدوکی

وانا کمان ہفضل ناسیہم

مالهمش نبض ف عروقي

لان قلبي مش غاويهم

يا خساره ظلمتى قلبك

وقلبي كمان ظلمتیه

جرحتیه بالشك فيه

انهارده قتلتیه بايديكى

واللى مات مش هيصحى

ولا الروح ترد فيه

انهارده أقدر اعزيكى

لما ضميرهم باعوه

خدوا عقلك غيبوبه

لجل عن قلبك أتوه

وكمان قلبك يبعدوه

وأجرى عليهم واشترىهم

وصدقتهم...!!

أجرى عليهم

لا أنا غاويكى .. ولا .. غاويهم...!!

